



Člonka mlodžiny Lužiskeje aliancy Anna-Rosina Selmerojc, městopředsyda Ignac Wjesela, předsyda Hanzo Wylem-Keł a Haňžka Wjeselic (wotlěwa), posledni tři mjenowani přislušeja Serbskemu sejmej, z wot delegatow hłowneje zhromadźizny Europskeje swobodneje aliancy přiwzatej deklaraciju wo samopostajowanju kónc minjeneho tydženja w Brüsselu Foto: Lužiska alianca

## Zajim druhich skupin zbudził

### W Europskej swobodnej aliancy nazhonjenja Serbskeho sejma prašane

Brüssel (SN/at). „Europska unija ma domizna wšěm ludžom kontinenta być. Dajće nas Europu zhromadnje tworić; Europu ludži, narodow a regionow.“ Tak rěka w zakónčacym politiskim wozjewjenju hłowneje zhromadźizny Europskeje swobodneje aliancy (EFA) wot 7. do 9. měrca w Brüsselu. Wšitcy ludžo, a zapřijate su mjeřišinowe zhromadženstwa kaž tež tajke w diasporje, zaslužeja sej wjace respekta. Heslo zetkanja „Samopostajowanje je prawo, žane złoštništvo“ zwurazni so zdobom w nominowanju politikarja za njewotwisnosć Katalonskeje Oriola Junquerasa, kiž sedži w španiskim jastwje, za načolneho kandidata EFA k wólbam Europskeho parlamenta. Wob-

dźělnicy Lužiskeje aliancy a jako hosćo Serbskeho sejma mějachu nominowanisku proceduru „za jara symboliski akt“.

Předsyda Lužiskeje aliancy (ŁA) Hanzo Wylem-Keł njeje so EFA a waliziskej stronje Plaidd Cymru jeno za podpěru w zwisku z loňšimi přěnimy wólbami Serbskeho sejma džakował, ale rysowaše před plenumom nastaće, strukturu, wašnje a čezišća džěla noweho serbskeho zastupnistwa. „Naposledk sym so k našej próstwje na EFA wuprajil, Serbski sejm dale podpěrać při připóznaću a jednanjach wo nowych statnych zrěčenjach ze Zwjazkom a krajomaj“, zdžěli předsyda ŁA a člon sejma na naprašowanje našeho wječornika. W Brüsselu rjekny Wylem-

Keł nastupajo prócowanja, serbsku rěč zachować, mjez druhim: „Mamy po dramatiskich dopóznačach ewaluacije projekta Witaj w Braniborskej nuznje politiski puč za kulturnu a kublansku awtonomiju runać.“

Sejmar dr. Andreas Kluge bě přěni raz na konferency EFA. Wón je wobkedžbowal, zo „je intelektualna, logistiska a nic naposledk financna próca, w swojskej zamołwitosći wuspěšnje politiske struktury natwaric, mjez delegatami EFA wulke připóznaće žnjala. Wuwić pokazuje krotu wolu a kmanosć Serbow, swojske problemy w zmysle samopostajowanja lěpje w swojskej zamołwitosći rjadować.“ Po mustrje němskeho „parlamenta Pawolskeje cyrkwe“ demokratiske prawólby za přewinjenje towaršnostneje stagnacije přewjesć, „je jako powšitkowny model zajim tež druhich kulturnych skupin zbudził“, Andreas Kluge zwěsći.

Próstwu Lužiskeje aliancy wo dalšu podpěru su delegaća z přiwzacom deklaracije jednohlósne schwalili. Na to su po informaciji serbskich wobdźělnikow zastupjerjo z Hornjeje Šleskeje a Kašubow z Pólskeje, strony Morawané z Českeje, Korutanskich Slowjencow, z Elsaskeje a regiona chorwatskeje Rijeki kaž tohorunja ze serbskeje Wojwodiny zajim za zhromadne džělo zwuraznili. Dorčeli sej su, sympozij pod patronatom EFA na temu „Samopostajowanje zwoprawdźić“ a w druhim pollěće 2019 we Lužicy wotměć.